



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 7

Yangia anidakangma :



Tir Yimiyim



tir_yimiyim



tir yimiyim

TAPAK 3

Nepal home minister Sudan Gurung-i mapa toktsüogo

Rajnath-i Pakistan nem tekümdangtsü metetdaksü



VOL. XXIII ISSUE NO. 189 (ADOK 189) DIMAPUR YANGTEPNÜ (THURSDAY) RONGCHII (APRIL) 23, 2026

₹ 5.00

Guwahati nung Aquaex Northeast Expo 2026 alitsü

Kohima, April 22, 2026 (TYO): Northeastern region nung fisheries renlokdahtsü atema June 12 nungi 13 tashi Guwahati nung Aquaex Northeast Expo 2026 amungtsü.

"Iba expo ya National Fisheries Development Board-i Aquaex India den yarotepa ayongzüksü" ta Fisheries & Aquatic Resources, Nagaland Director Rongsennungba-i ashi.

Iba sentong ajanga Northeast region nung modern aquaculture practices ajungkettsü, productivity teimba akümtsü aser market tesentaktep akangshitsü nükjiding lir.

Iba expo ajanga northeast state 8 nungi ango metsürtem, hatchery operators, feed manufacturers, equipment providers, financial institutions aser researchers anidentsü ta Rongsennungba-i ashi.

Aquaex ya farmers, scientists, aser institutions ajurutepba sabang ka ama lir ta National Fisheries Development Board (NFDB) nung Governing Body züngsem Anup Kumar-i ashi.

"Protein aketba chiyungtsü dalangtiba rongnung ango ya ka

lir saka India nung per capita consumption ya seret 11-12 shi dang lir aser iba ya global average den tesadang ka dang" ta pai tebilemtsü ka lemsatp.

Blue Revolution aser Pradhan Mantri Matsya Sampada Yojana amala sorkar scheme tem ajanga ango teimba metsür aser 197 lakh tones alizüng yua lir ta paisa shisem.

Iba expo nung exhibitors 50 temai pre-harvest, harvest, aser post-harvest sectors lemsateptsü aser investor sendentem amentsü ta Kumar-isa ashi.

Anup Kumar nung fisheries inyaksü lenmang aika lir aser tzi peria dang liaka tanga state tem nungiang ango bener arua achir ta Anup Kumar-isa metetdaksü.

Iba expo ajanga modern aquaculture technologies angutsü aser ango metsürtem o entrepreneurs-i tangazükba jenti angutsü ta paisa ashi.

May 16 tashi nung ango metsürtem entrepreneurs, researchers, aser fisheries graduates tejangrartemi expo nung adentsü atema department ajanga tenüng agütsütsü akok ta Director Rongsennungba-i ashi.

Mon Wildlife Division lapokogo

Dimapur, April 22, 2026 (TYO): Environment, Forests & Climate Change and Village Guard Minister C L John-i Mon Wildlife Division tenzüksüogo.

April 22, 2026 nü agiba sentong nung Y. Kikheto Sema, IAS, Principal Secretary to the Government of Nagaland, Department of Environment, Forests & Climate Change aser Vedpal Singh, IFS, Principal Chief Conservator of Forests & Head of Forest Force, Nagaland na aden.

Arem shirurtem aser arem wazüka ayutsüba nung loktii shilem agitsüba kanga tongtipang ta Minister John-i ashi.

Pai Konyak Union, Konyak Nyupuh Sheko Khong, Konyak Students' Union aser arogo tanishirtem dang iba mapa nung yariteptsü ayongzük.

Nagaland sorkar aser Forest Department-i Mon Wildlife Division amenokba atema kanga pelar. Bangdak ketdangsurtemi iba office tiptema bener aotsü mepishir ta Minister John-isa metetdaksü.

Vedpal Singh, IFS-ia o jembidang taoba mapang pai Mon nung mapa inyangdang dang ajangshibatem lemsatp.

"Tanü nübortemi climate change ajanga temelenshi bentsür aruba angateta akümer aser shikariba nungi wazüka ayutsü tangatetba tasen adoker. Tanü yimsüng aikati aser KU aser KSU ama teloktemi arem shiruru wazüka ayutsü maparen balala inyaker" ta Vedpal-isa ashi.

"Climate change ajanga asenok nem timtem agütsür. Indian constitution nung Arrla 371 ajanga asenok climate change nungi kümzüka mayutsü anungji nübortemi süngdong talila tema arem shiruru aser lipoküm wazüka ayutsüla" ta Y. Kikheto Sema, IAS-ia ashi.

"Nagaland sorkar aser Department of Environment, Forests & Climate Change ajanga Chen nung Forest Beat Office aser Mon town nung Wildlife Division lapokba atema kanga pelar" ta Konyak Union President, Yamao Konyak-i o jembidang ashi.

Iba sentong nung mendenji Supongnukshi, IFS.Addl. PCCF (Territorial) liasü, District Chaplain Rev. Yeangphong Konyak-i temoatsü meshia sarasadem aser Chupitho, SFS, Wildlife warden, Mon Wildlife Division-i anküp tepela o jembi.

BJP Kohima-i osang jangjashitsür; Opposition aitsür

Kohima, April 22, 2026 (TYO): Opposition party temi public ratadaksür anungji women's reservation aser delimitation dak sendakba osangtem jangjatsüsa akümer ta Bharatiya Janata Party (BJP) Kohima district-i tanü ashi.

"April 16-17 anogotem Parliament nung Constitution (131st Amendment) Bill 2026, Delimitation Bill 2026, aser Union Territories Law Amendment Bill 2026 benok. Item bill ajanga women's reservation nung temelenshi asütsü shidang saka Lok Sabha nung bill magizük" ta BJP Nagaland State Executive Member Vineizo Tsurho-i ashi.

"Nari Shakti" bill ta ajaba women's reservation framework ajanga taruba Census sülen delimitation maparen nung tetsür nem 33% lezmüksütsü sendakteper. Item temelenshi ajanga tetsür nem tekaratiba ajanga shilem lezmüksütsü aser 2029 general elections nungi

mapa tenzükür ta Tsurho-isa ashi.

India nung delimitation nungdaker aser iba ya nütsüng yongsük renlokba den putepa constituency ladangshitsü atema lir. 1971 nungi India nütsüng yongsük kanga teimba kümogo aser iba jagi Lok Sabha menden teimba akümtsü nungdaka kümogo ta paisa ashi.

Ajisüaka, Parliament nung Congress, Samajwadi Party, TMC aser DMK teloktemi tetsür anema noktak aser tetsürtemi shilem tuluba agitsü maparen noktang ta Tsurho-i tai tongloksü.

"Prime Minister Narendra Modi aser Union Home Minister Amit Shah nati ashiba ama item bill ya democratic maparen akangshitsü aser tetsürtemi shilem kasa agitsü atema lir. Tenatisa delimitation ya ozüngi melaba mapa ka lir ta shiogo aser southern state tem dena shinga takoksa mangutsü" ta Tsurho-i lepshia metetdaksü.

"2024 general elections nung women's reservation mapa meinyaktet kechiyong delimitation maparen nung mapa agir. Constitution ajanga tamangba yimsü nung ajemdaker reservation inyaksü memelar" ta BJP Kohima District Mahila Morcha president Leanne Kiewhuo-ia ashi.

"Taoba nung agiba women's reservation ozüng ya constitutional framework ka yanglutsü atema liasü. Iba mapa ya delimitation atemba sülen anng inyaktetsü aser Delimitation Commission Act nung temelenshi asütsü kecha mebenok aser 2029 tashi agiba elections nung mekongshitsü" ta Kiewhuo-isa ashi.

BJP Kohima district-isa nübortem dang tetsürtem asoshi 33% reservation mapa tenzüksü asoshi pusema nungittsü aser opposition party temi legislative maparen nung tenokdangba magüttsü mepishia metetdaksüogo.

Apr 30 nü Nagaland nung 8 buba NEPEX agitsü

Dimapur, April 22, 2026 (TYO): Home Department kübok Nagaland State Disaster Management Authority (NSDMA)-i April 30, 2026 nü 8 buba Nagaland Emergency Preparedness Exercise (NEPEX) ayonga agitsü.

National Disaster Management Authority, Ministry of Home Affairs, GoI ajanga teyari agüja NSDMA-i large-

scale mock exercise agitsü.

Taküm simulation nung menoknok aser tsüngsang-mopung dak sendakba lendong tulutem nung temulung agütsütsü.

Iba dak sendakba nung April 29, 2026 nü State Emergency Operation Centre, Capital Convention Centre, Kohima nung Table Top Exercise ka agitsü. Iba sentong line department AHOD/

nodal officer Disaster Management (in person) adentsü aser DDMA's ajaki online ajanga shilem agitsü.

NEPEX dak sendakba osang metetnürtemi officer in-charge, Khroulou Koza Lohe, Assistant (Training and Education), Home Department @khroulou.lohe@nsdma.org or phone #9856132002 den tongteptsü akok.

MLA Achumbemo-i lanurtem dang ak metsütsü ayongzük

Kohima, April 22, 2026 (TYO): Nagaland nung akshi supply peria angutsü atema lanurtem mapa inyaksü ayongzük ta Naga People's Front (NPF) secretary general aser MLA Achumbemo Kikon-i ashi.

Kohima nung April 21, 2026 nü Piggman - Tender Hygienic Pork store lapokba sentong nung MLA Achumbemo-i iba tayongzükba agütsü. Symbiotic Foods Pvt. Ltd. ajanga Piggman - Tender Hygienic Pork store lapoker.

Nagaland nung kümshia akshi 60,000 tonnes mesüra anogoshia seret 64,000 shi nungdaker saka local production ji 30,000 tonnes shi dang lir aser nungdakba 50% agi matonger. Supply peria manguba ya local entrepreneurs aser ak metsürtem asoshi maongka lir ta MLA Achumbemo-isa ashi.

Naga sobaliba aser benjungbentsü nung akshi ya tongtipang shilem ka lir. Asenoki

hygienic pork production aser consumption ajungkettsüla kechiyong quality & food safety ya tongtipang lir ta paisa ashi.

Piggman venture ya entrepreneurship indang tatishitsü ka lir anungji zünger mapa manguba lanurtemi piggery aser allied sectors asoshi shishilembatsü lenmangtem bushitsüla, kechiyong sorkar mapa mali kümogo ta Achumbemo-isa metetdaksü.

"Iba enterprise ya 2014 nungi tenzük aser idangji farm tila ka nung ak 25 liasü. Tangbo 200-sow breeding farm kümogo aser kümshia ak chanu 2,500 shi mepor" ta Piggman CEO & co-founder Manoj Kumar Basumatary-i ashi.

Piggman ajanga ak metsürtem den külemi inyaksangshia arur aser scientific pig farming practices ajungketer. Talisa India aser northeast den putepa European farming

systems nungi angazüka inyakyim benshir ta pai ashi.

Basumatary-i taoba mapang bank nung inyaka liasü aser 2013 küm mapa toktsür pig farming sector nung ajemok.

COVID mapang par company-i pork processing maparen ulushi aser tangbo imported processing equipment amshia pork products aika agütsür ta Basumatary-i ashi.

Kohima nung lapokba ya Piggman indang store 11 buba lir. Onoki Northeast aser tangalen iba company tuluba küma odaktsütsü nükjiding lir ta paisa shisem.

Tanü MLA Achumbemo Kikon-i CANSSEA Building, Middle Bayavu, Kohima, High School road nung Piggman franchise outlet lapoktsü.

Iba sentong nung Keta Jamir menden liasü, Rongsenyangla Aier-i temoatsü meshia sarasadem aser Chuba Ozukum-i anküp tepela o jembi.

Fazl Ali College nung Earth Day 2026 amung Kohima nung lenmang tezülen gari anena ayuba nokdangar



Dimapur, Rongchii/April 22 (TYO): Libajen wazüka ayutsü, tzü-mopung khuret abentsü aser sustainable living indang awareness agütsütsü mechi küm shia alima ajunga nung Earth Day ya April 22 nü amunger.

Fazl Ali College, Mokokchung nunga Earth Day 2026 ya 'Our Power, Our Planet' omen nung ajemdaker Eco Cluba ajanga Signature Campaign ka ayongzüka liasü.

Iba anogo 6th Semester University tatidang den department kar practical tatidang aliba aser BA 2nd aser 4th Semesters asoshi akhi ama

class aliba mechi iba sentong ya tongmelang ka ayongzüka liasü.

Kaketshir, tesayur aser staff temi iba campaign nung tejangraba tulu nung shilem agia pledge board nung meyongnem agüja libajen wazüka ayutsü, sustainable living aser pei temeket müreka ayutsü asoshi temulungtetba lemsatepa liasü.

Eco Club ajanga Departments ajunga dang Earth Day ya Cleanliness Drives, Awareness Programmes, Plantation, Green Quiz, aser Thought for the Day ama eco-friendly sentong balala ayongzüksü ajungmesoa liasü.

Yamaji Ao aser Chemistry

Departments-i One Minute Pledge ayongzüka, Botany Department-i omen nung ajemdaker pledge programme ka ayongzüka.

English Department nung kaketshir ajaki 'My Promise to Earth' omen kübok shiti ka-ka züludaktsü aser Functional English tesayur temi "Group Discussion" ayongzüka liasü.

Geography Department-i tesayur aser tatidang agütsüba kaketshir nem eco-friendly seed pencil lema agütsü. History, Commerce aser Maths Department ajanga 'Thought for the Day' ayongzüka liasü.

State nung NEPEX atema capacity building sentong agi

Dimapur, Rongchii/April 22 (TYO): Nagaland Emergency Preparedness Exercise (NEPEX) 8 buba Edition kübok state-level mock exercise agütsü aliba atema renemshia state tesem ajungalen capacity-building sentong April 22, 2026 nü agiogo.

KOHIMA: Kohima nung 8 buba NEPEX kübok state-level mock exercise alitsü atema renemshia virtual capacity-building sentong Deputy Commissioner, Kohima indang office nung agia liasü.

Kohima nung DC Office nungi state-level video conference nungya Deputy Commissioner and Chairman, DDMA Kohima, B. Henok Buchem den Superintendent of Police, Krodi Rhetso aser Police, Medical, Municipal, aser emergency services densema department balala nungi ketdangsürtem aden.

April 30 nü agütsü aliba mock exercise ya menoknok 7.7 magnitude anoker ama agütsü. Iba mapang ki o jen aika raksaba, kitsük-kirong lendong aser alinen mapang emergency response systems tendangtsü.

Iba drill ya totzü aser gas rizünga ayudak ama tongtipang installations nung teraksa ajuruba ama agütsü. Asü-amar aser lendong ajurur aika ketdangsütsü atema mozüki renemshia alitsü aser relief camps, staging areas aser Incident Response System (IRS) mechanisms lapoktsü.

State Emergency Operations

Centre (SEOC) aser District Emergency Operations Centres (DEOCs) ajanga Incident Command Posts amenokba densema inyakym ketdang asütsü.

DIMAPUR: Dimapur nung 8 buba NEPEX 2026 asoshi renemshiba ama virtual capacity building programme ya Video Conference Hall of the National Informatics Centre (NIC), Deputy Commissioner's Office, Dimapur nung agia liasü.

Nagaland State Disaster Management Authority (NSDMA), Home Department, Kohima nungi totuyuba agütsüba ama iba sentong ya ayongzüka.

Iba senden nung Major General (Retd.) Sudhir Bahl, Consultant of National Disaster Management Authority (NDMA) menden liasü aser pai lendong timtem mapang sendaktepa aliba department balala teinyaktsü indang lemsatepa liasü.

Bahl-i standard operating procedures, communication strategies aser department balala lungjemer inyaktsü nungdakba indang rateta ashi. Pai disaster management nung technology amshitsü nungdakba, talisa keraa tekum dangtsü agütsütsü aser osang prokshitsü atema Google Android Earthquake Alert System amala amshitsü indang ashi.

Iba sentong nung sendaktepa aliba departments balala nungi ketdangsürtem arua shilem agia onük balala nung jembishiniä

shisa lemsatepa liasü.

CHUMOUKEDIMA: Chümoukedima nunga menoknok lendong asoshi renemshia alitsü atema state-level coordination conference ya Deputy Commissioner indang Conference Hall nung National Disaster Management Authority (NDMA) kübok video conferencing ajanga agia liasü.

Deputy Commissioner, Chümoukedima, Polan John, NCS-i iba senden nung jembidang, district nung Tabletop Exercise (TTE) ya April 29, 2026 nü agütsü aser iba sülen full-scale mock drill ya April 30, 2026 nü agütsü ta ashi.

Pai department ajunga dang tabletop exercise nungya shilem agütsü ayongzüka aser full-scale mock drill nungya agencies balala renemshia aliba aser telangzüba agütsütsü akokba tashi tendangtsü ta ashi.

Disaster response ya Police aser Fire & Emergency Services ama first responders atema kisung masü saka Incident Response System (IRS) kübok departments ajak shilem lir, ta DC John-i ashi.

Department ajaki nübu, technical aser resources balala agi yariteper ta ashi.

Iba sentong ya Nagaland State Disaster Management Authority (NSDMA) ajanga menoknok ama alimar lendong mapang telangzüba agütsüba nung tashi itshitsü nükjidong nung ayongzüka liasü.

Dimapur, Rongchii/April 22 (TYO): Gari tem tiptema senzütsü aser nürburtem takum kumzükam ayutsü mechi temelaba makai lenmang tezülen gari anena ayutsü memelar, ta Deputy Commissioner, Kohima-i sangdong ka nung metetdaksügo.

Tapi agi lenmang tezülen gari anena ayuba ajanga gari senzütsü lenmang temesüba kumdaktsür, ta Deputy Commissioner, B. Henok Buchem-i ashi.

Sector Magistrate aser ward ketdangsür temi December 4, 2025 nü Assamese Church Junction nungi Ward-18

kübok National Highway-29 Junction tashi semdangba sülen iba totuyuba ya agütsür.

Iba mapang ngutetba ama, jangjateta aliba lenmang nung Right of Way (RoW) telungzük nung tang nungi tenzüka gari anena ayutsü khenyongi memelar. Iba totuyuba nung aibelenba gari tem administration-i atsür aotsü aser iba sen gari kiburi menoktsü aser tapet ozüng kübok merenshitsü, ta ashi.

Maneni DC Kohima ajangasa Kohima Traffic Police dang iba ozüng tashi ita amshitsü mechi nungdakba maitsütem aser barricades inoktsü metetdaksügo.

Dimapur DPDB-i tongtipang terenlok maparen indang jembidi

Dimapur, Rongchii/April 22 (TYO): District Planning & Development Board, Dimapur ita shia amenba senden April 22, 2026 nü Deputy Commissioner, Dimapur indang Conference Hall nung Deputy Commissioner, Dr. Tinojongshi Chang lenisüba kübok mena liasü.

Advisor, Industries & Commerce, Hekani Jakhalu-i iba sentong nung jembidang, ketdangsürtem Padumpukhuri nung office tasenbai pela agizük aser yangji parnok jangratema mapa inyaktsü ta ashi.

Nungdakba mapang colony nung alirtemi yariteptsü aser anisungzüka aser jangratema alitsüsa mera agütsü ta lai ashi.

Jakhalu-i DPDB ya society registration atema tentetba body ka kisung masü saka sorkar inyakym aser terenlok mapa nung tongti shilem agir, ta ashi.

Iba sapang nung tongtipang telemtetba tem agir aser ketdangsürtem teka amteper inyaktsü nungdaker, aser kati ka akumtsüboa aser yaritepba ajanga dang takok angur, ta lai ashi.

Maneni Child Rescue Van den sapi aser documents tem Child Helpline 1098 nem amoktsüba asoshi lai Advisor, Labour, Employment & Skill Development and Excise, aser Chairman DPDB Dimapur, Moatoshi Longkumer dang pelaba lemsatepa liasü.

Iba senden nung Tsungchir Education Society aser Dimapur Commissionerate Community Alliance for Resilient Empowerment Society (D-CARE) indang registration agizüka liasü.

Parnoki Zasisivikho Zakiesato Memorial Higher Secondary School indang kibur tenung melentsü atema No Objection Certificate (NOC) ka agütsütsü indanga jembidi

asur DEO dang tejangja osang agütsütsü tuyua liasü.

Board-i Asian Mission Institute amenoktsü atema agizüka NOC agütsü, kong Arts, Science aser Commerce nung UG, PG aser ITEP courses tem agütsütsü.

DC Dr. Tinojongshi Chang-i Census 2026 ya June ita agütsü ta metetdaksü aser ketdangsürtem dang enumerators tenung agütsütsü nenshia ashi. Census mapa ya app nung ajemdaker inyaktsü aser pei sasa tenung zülüokba melatsü ta pai ashi.

Sustainable Development Goals (SDG) dak sendakba nung Northeast region nungi districts 158 rongnung Dimapur district ya jenjang 10 buba nung lir ta Chang-i ashi.

Iba jenjang tongtetba ya mapa tajung lir, saka ano tajungba akumtsü nungdaker aser iba atema senden ka April 24 nü amentsü, ta pai metetdaksü.

Paisa Special Intensive Revision (SIR) ya kanga tongtipang lir aser ibai electoral rolls update asütsü aser jangjashitsü nükjidong nung kibok sema mapang tatakzük nung inyaktsüba lir ta ashi.

Pai ketdangsürtem dang awareness agüja osangtsüsang prokshitsü ayongzüka liasü.

Iba senden nung züngsem tasen Dr. Diana Patton, ADC Dimapur, aser Khiuzan Kaurinta, EAC Dimapur metetpelaba mapang agia liasü.

Iba senden tenzüksü lia Advisor Moatoshi Longkumer-i Advisor Hekani Jakhalu aser Deputy Commissioner Dr. Tinojongshi Chang nung lia Child Helpline 1098 Dimapur nem Child Rescue Van indang sapi aser documents tem amokja liasü.



Kerala nung Thrissur district kübok Mundathicode nung Mongolbar aonung puja bomb yangluba tesem ka apokba sülen police temi iba tesem meita aoba noksa nung angur. Iba lendong nung nisung 13 asü aser aika yirua liasü.

Beijing-Delhi tayimtsü tenzükshiba ajanga linük ana tesendaktep akangshitsü

New Delhi, Rongchii/April 22 (Agencies): India aser China na tsünga tayimtsü indang indanga senzü tenzükba ajanga linük ana tsünga tesendaktep akangshitsü. Air China-i Beijing-Delhi service tenzükshiogo, ta China nung osang kaket Global Times sangdong ka ajanga metetdaksü. Beijing aser Delhi tashi tayimtsü indang indanga senzüba ya Mongolbarnü nungi tenzükshitsü liasü, koba China nungi India-i aruba lenmang tanabuba lapokshiba lir. Global Times-i ashiba agi, tayimtsü ya hopta nung asemben (Mongolbar, Hokolbar aser Deobar) senzütsü aser parnoki Airbus 330 tayimtsü ka amshitsü. Economy class taah

yan 3,570 nungi tenzüksü imlar. Iba tayimtsü ya nikongtsütsü 3:15 nung apusotsü aser Delhi 8:20 nung atongtsü. China Eastern Airlines-i April 18 nü nungi Kunming aser Kolkata na tsünga tayimtsü senzü tenzükdaksüba sülen anogo ishika lir tang ano linük yimtiba ana tsünga tayimtsü senzü tenzükogo. China Eastern Airlines-i ashiba agi, Kunming-Kolkata lenmang nung hopta shia tayimtsü trok senzüer aser iba ajanga senzusenpongertem tayongba kümdaksütsü aser linük ana tsünga tesendaktep tajungba akümtsü. March 30 nü IndiGo-i Kolkata aser Shanghai na tsünga anogoshia tayimtsü

senzüdaksü tenzükba liasü, koba India aser China na anüing ajanga tesendaktep akangshiba nung alizüing tasen ka tongtetba liasü. Linük ana tsünga 2020 küm Galwan nung mangatettep adokba aser Covid wara poktetba ajanga tayimtsü mesenzü liasü. 2025 küm November 19 nü IndiGo-i, Delhi aser Guangzhou, China na tsünga anogoshia tayimtsü senzüdaksütsü ta sangdonger liasü. Iba lenmang nung IndiGo indang Airbus A320 tayimtsü senzüdaksüdar. Ministry of External Affairs' (MEA)-i India aser China na tsünga tayimtsü indang indanga senzü tenzüksü ta sangdongba sülen item jenjangtem ya agia arudar.

Modi dang kiralongrar ajaba atema Kharge jaok

New Delhi, Rongchii/April 22 (Agencies): Congress tekolakba Mallikarjun Kharge-i Ato Kilonser Narendra Modi dang kiralongrar ajaba ya Election Commission of India-i kanga süoki ia agiogo, aser pa nem Bodhbarnü show cause notice ka agütsüogo. Union minister Nirmala Sitharaman densema BJP lenirtemi Bodhbarnü EC den ajurutepa iba o jembiba atema Congress tir anema jenjang tesashi agütsü takhangba agütsüba sülen iba ya atalokogo. Mongolbarnü Congress tir Kharge-i, Modi den longjemba atema All India Anna Dravida Munnetra Kazhagam (AIADMK) aitsüba mapang Ato Kilonser Narendra Modi dang kiralongrar ajaba ajanga

mepetmesü tulu adoka liasü. Congress lenir yagi mapang tatsükalir iba olen ya jangjashija liasü. Iba sülen Bharatiya Janata Party (BJP) puri, Kharge-i jembiba o ya Modi mezügmeshiba dang masü saka India nunger billion 1.4 mezügmeshiba lir ta ashi. Chennai nung osangbenertem den sensaksemba mapang Pai AIADMK puri BJP den longjemtsü atema telemtetba agiba ashishi. Pai, "AIADMK züngsemtem shirnoki Annadurai indang noksa ayur, parnoki Modi den longjemer? Pa ya kiralongrar ka lir. Par party-i tebandang makai inyaksangshitsü aser ochi obendang dak tamang makar.

Item nisungtem ya parnok den adener; iba tetezü parnoki democracy tashi meiti kümdaksü," ta ashi. "Nenoki BJP matsüngdang mapudakba aser nokdaker raratsü akokba lenir nüngdaker aser aji MK Stalin lir. Tanü AIADMK maitsü samaogo. Parnok ya BJP indang 'silent-slave partner' ka kümogo. Parnoki Tamil Nadu tejangraba kümzüka meyettsü, kechiyong parnok PM Modi'er alar kümogo," ta pai shisem. Iba sülen mapang tatsüka lir Congress tir yagi pai jembiba olen ya jangjashitsüogo aser pai PM dang kiralongrar ka ajaba masü saka pai nüburtem aser political party tem amokmerener ta shinerba ta ashi.



Defence Minister Rajnath Singh Berlin, Germany nung India nungertem den sensaksemba mapang tangokba noksa nung angur.

EDinyakyim minprongba atema SC-i Mamata aitsü

New Delhi, Rongchii/April 22 (Agencies): January ita I-PAC co-founder Pratik Jain'er ki ED-i meita aoba mapang minprongba atema Supreme Court-i Bodhbarnü-i West Bengal chief minister Mamata Banerjee aitsüogo. "CM-i democracy nung tetsükdaksü adokdaksütsü atema system ajunga amshiogo," ta SC-i Banerjee dang ashi. Parnokisa bushisüngdang ka asüba mapang state chief minister kati meita oya aliba tesemi aitsü makoktsü ta ashi. March ita ken o angadanga mapang Supreme Court-i ashiba agi, TMC tekolakba yagi ED-i tesem ka meita aoba mapang minprongba liasü. Senotsü ochi meshi-i amshiba dak sendakba nugn ED-i January ita iba inyakyim benoka inyak, saka Banerjee-i Jain'er ki meita oya aliba mapang par kidangi aiba sülen iba ya yimden yimsüsüba dak sendakba nung ken o ka aküm. Central agency yagi ashiba agi, TMC lenir yagi iba tesem nungi tongtibang kulitem agin. West Bengal nung April 23 aser April 29 nü election agütsü lia Supreme Court-i iba ken o ya angadangogo. Bengal nung Trinamool Congress aser opposition Bharatiya Janata Party (BJP) tongtibangsa toktepsü. Ken o ya Justices PK Mishra aser NV Anjaria nati

angadang. Ken o angadanga mapang iba bench yagi, chief minister-i iba amala jenjang agiba atema democracy yirutsür ta ashi. SC-isa, shingaia iba amala tensa ka ajangshitsü ta bilema maliasü, ta ashi. Okadaki Bodhbarnüa maneni ED-i benokba ken o angadangogo, shirnoki Mamata Banerjee aser tangartem anema Central Bureau of Investigation nem bushisüngdaksütsü takhangba agüja liasü. January 8 nü ED-i I-PAC co-founder Pratik Jain'er ki meita aoba mapang West Bengal chief minister Mamata Banerjee-i iba kidang yagi ia kuli kaket aser electronic device tem bener ao. TMC lenir yagi ashiba agi, lai bener aoba kuli kakettem ya senotsü ochi mashi inyakyim dak kecha sendaka mali aser Trinamool Congress indang kuli kakettem lir. I-PAC ya 2019 küm Lok Sabha election nung party indang political consultant liasü. Laisa, central agency ya tangari mejur inyaksangshir ta shia parnok aitsü. Ajisüaka ED-i ashiba agi, bushisüngdang ya shishilembar Anup Majee dak sendak aliba 2020 money laundering aser coal smuggling scam dak sendaka liasü. I-PAC co-founder Vinesh Chandel ya coal scam dak sendakba nung ED-i puogo.

Rajnath-i Pakistan nem tekümdangtsü metetdaksü

New Delhi, Rongchii/April 22 (Agencies): Defence minister Rajnath Singh-i Germany nung India nunger den sensaksemba mapang Operation Sindoor tenüngsanga jembiba aser ashiba agi, India kidangertem ka dak alaker ajak shitak dang lir. Kiralongrartemi Kashmir kübok Pahalgam maker küm ka ajungba anogo April 22 nü Singh-i iba olen ya lemsatapa liasü. Pahalgam nung kiralongrartemi nisung 26 tepset aser parnok ya timba civilian tem liasü. Germany nung jembiba mapang Singh-i Pakistan nem tekümdangtsü metetdaksüogo, aser kidanger yagi mepetmesü adodaksütsü merangra "dot, dot, dot" asütsü ta ashi. Operation Sindoor takok ngua benoka inyakba atema India nunger sepaitem tenüngsanga jembiba mapang Singh-i, India military taoba mapang dang nungi tashi taitba kümogo, ta ashi. "Operation Sindoor mapang asen army-i kechi inyak aji ashitsü nüngdak mali... Asenok military tashi ya taoba mapang dang nungi tashi taitba kümogo," ta pai shisem. "India-i pei mulungka nung alima nung linük ka danga mamak.. Ajisüaka kidangeri

mepetmesü adokdaksütsü merangra 'dot, dot, dot'.. Kidanger ajak shitak dang saka timtem agütsür ka lir," ta pai shisem. Defence minister-isa, India koda defence dak sendakba nung tangar dak metaloker aliba nungi tangar dang defence hadir ayoker ka aküm iba indang lemsatapa. "Taoba mapang defence dak sendakba nung tenüngdabatem peritsü asoshi asenoki tangar dak metaloker liasü. Ajisüaka tangbo iba ya melenshiogo. Tangbo asenok ya tangalen nungi bener arur ka masü saka belener yoker ka kümogo. Asenoki defence oset crore 39,000 shi export süogo," ta pai ashi. Anogo asem atema Germany semdangba mapang Singh-i mezüngbuba anogo Defence and Security dak sendakba nung German Parliamentary Standing Committee den sensak asem aser Asia anüolen tang tensa mejungi aliba indang sensaksemba liasü. Singh-i ashiba agi, Strait of Hormuz nung tang kechi atalokdar, iba yagi alima ajunga aser talisa India dak kongshitsü, kechiyong energy asoshi tenüngdabatem iba lenmang ajanga import asüba dak India metaloker lir.



TIR YIMYIM YIMOBILEM (EDITRIAL)

DIMAPUR THURSDAY, APRIL (RONGCHII) 23, 2026

Marks agi tarutsü mashir

Asen lima nung tang ya kaketshirtem asoshi class 12 class 10 tatidang result adokba mapang lir. Atangji, kaketshirtem rongnung kaketshisatsü toktepa bushir asünungji, nisung ajaki takokertem rongnunga shirnoksa mark teimtiba ngua tematiba takok jenjang angu ta asüba nung rangloker aser tepela agi yimjak nung tenüngsang agütsür. Aji oda, class 10 aser 12 tatidang takok anguba mark agi, kaketshir ka asoshi taküm piyong inyaka aotsü asoshi kechika azüngtsü ta asüba nung telemtetba agir. Ibaji kaketshirtem ajak asoshi taküm nung telemtetba agidak lenjem tongtibang ka lir. Ajisüaka, kaketshirtem asoshi dang masü saka tsüraburtem asoshia kaketshir ka atema taküm piyong atema telemtetba agiba maparen nung tekümdangtsü kaji, tatidang nung mark aika anguba kisüng jagibo Tsüngremer sentong aser pa mesüra la taküm lenmangji mesayur, anungji kaketshirtem class 10 aser 12 tatidang nung takok ngur külen ano azüngtsü atema telemtetba agidang, mark kwi angu ta masü saka kechi azüngtsü jangrar aser kechi inyaksü sempet keta lir ta asübalen tuluba atsünga bilemstsü aser telemtetba agitsü nüngdaker. Aji oda, mark tajung ngua tematiba takok jenjang angubaji junger saka iba jagi taküm piyong takok angutsü ta masü, ano mark junga manguba agi temulung masübajia tim dang, saka iba jagi taküm piyong tamakok nung dang aotsü ta masü, nisung ka taküm nung tang amaji kodangsa telemtetba agitsü lenjem ka tongdir, idangji telemtetba shitak agiteter asü magiteter ta asüba dak tuluka keta lir. Tatishitsü agi, tebur kati Fashion designing azüngtsü jangrar saka asenok tsüraburtem aikati ibajibo tetsür mapa amato bilemer, anungji kangshia tanga ka züngdaksür. Kasaji, ano tetsür kati sepai akümtsü jangrar saka asenoki kangshia Fashion designing agitsü yoker. Takok manung tamakok tenzükbaji ibaji lir. Aji oda, asenoki aiben kechi jangrar aser kechi sempet keta lir ta asüba dak rangloker telemtetba agir masü saka mark repranger telemtetba agir, anungji asenok ajaki angatetba kaji mark aika ngua junga takok ngura Sceince azüngtsüla aser science zünger medical mesüra engineering azüngtsüla ta bilema telemtetba agir, anungji class 10 aser 12 nung mark junga angurtembo Arts, Humanities, Commerce aser Theology züngnüaka itemji azüngtsübo mapet aser takoksa amai bilemer. Iba ama tangatetba tai ka asenok dak aliba agi, meteta aser memeteti tanur tajung aika pei mapa nung tamakok anguba asenoki angur. Kaketshir ka asoshi kechi züngdir züang, pei jangraba ka asütsüla aser kechi mapa inyakdir inyakang pei meimba mapa ka asütsüla. Iba jagi kaketshir ka shisabolua azüngtsü melen pelashishia azüngtsü aser tezüdanga inyaksü melen jangratema inyaksü. Tazüngdang class 10 aser 12 ama nung takok angubaji taküm lenmang nung aotsü atema kishi lapoktsür amai lir, anungji kishiji ajanga kobaleni ao nung pei taküm nung Tsüngremer nükjidong atongtsü ta shisadanga, peisasa pei sempet meteta telemtetba agitsübaji kanga tongtibang asütsü. Atangji, kechi azünger ta asübaji tongtibang saka koma azünger ta asübajisa tongtibangtiba lir. Aji oda, tanü putu nungbo, akhi putu ama masü, joko maparen aika nung tazüngba degree masüngdang, saka nai kechi metet aser kechi inyaksü koka lir ta asübaji dang mapa inyakdak agir. Iba ama putu nung taküm arishi tatsüka nung ya kechi inyaksüar memetet ser degree atema kümsa küm azüngtsüa menügdaker, kechiyong tatem nungbo alima nunga aser kotak nunga, na koba tashi azüng (?) ta masü saka nai kechi tajung inyaktet ta asübajiang agitsü. Aji oda, tanübo kidang nungi pilaa talangkati tazüngi aotsüa menügdaker saka kidang nungi online ajanga angazükbajiang, ashiko, talangka nung oagi mapang aser rongsen aika endoka azüngba dang nungi tajungba aser tajangzük tuluba asütsüa akok. Iba ama inyakyim melenshia aoba lima aser putu ka nung asenok kaketshir aser tsüraburtemia alima aser nübortem nüngdak reprangteta, degree angutsü atema masü saka mapa inyaksü atema azünger ta angateta, mark anguba apia masü saka pei sempet aser pei jangraba apia kaketshisatsü aser mapa angazüktsü mulungtettsüla. Yangji takok aser jangratem lir.

OLEMSABANG

"SHI AKADANG ANGO AKA AMAI"

- WATIMEREN JAMIR

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Aji oda, anogo ishika lir külen merenbai tamo dangji ano oda sa yamai shia liasü. Amo, hau nai ashiana kübo o kütsü tenaji tantsür-tambor kümogo, saka oda nia juko mapang talangka tena den maju-ruteper asünungji oda ano iba-mai ang shiranga alidang yongi ni asen yimdakjiagi aonungang kangasa tajungba asütsü amai nibo bilemer ta shia tenaji sensaksema liasü. Sakasa, oda shia aruba amaji tamo jagi khenyongi mümulongi liasü. Aji oda, anogo ishika tsüngta bar tetsütu tasüba osang ang angashi. Idangjiang bar tamo tuagi Merenba tu yimdaki yok. Oda, temeimtsüka merenba ba tetsü den la shirang yipden nung alidangasüng majuruteptet tetsü mang ali nung remer sülen ang bar ki atong. Ano ajidang masü ano tebo tua anoba shirangbatu tama-Jungba ang Kümadok. Asünungji merenba tu ano tebo shirangbatu anepalutsüsa aküm. Oda, "shi aka dang ango aka" ta ashi ama ano ita anogo kobi meli-i tebo tua iba akümlir lima toktsür aotsüsa mapang agi bener arutsü.

Iba sülenji merenbatu ba alidak tedi-er kidang tuagi maoneseta apusutsüsa aküm. aji oda, yamaji Küm ishika liyonga or külen, jokola ba-a kibong akümtsü mapang atongnungji, tedi-i kangadang mera keta tenu merenbaji kibong Kümstsü. Oda, yamaji Küm ishika liyonga arudang ano tedi Toshiba tua oda parnok süpai taküm ka asüyongji ano tia makai tsükchir injang agi kongshia doctortemia mekumzükleti ba-a iba lima nung arishi tembang. Jokola oda, bar amala tua alimar yimya asünungji la-a amia alitsüsa tensa mapang agi bener arutsünungji, tebo tanubo merenbai tedi-er jabaso tu bar kidangi bai mesütsü anir aru. Aji oda, ba kinüngtsü shisa Jaka, taremsükden ano ajidang masü oda kangadang Tsüngrem metetba aser tamangtir tetsü ka asünungji la-i iba jabasojia kangadang temeimnung oda pe-i tetsü tasola amaidang meima aniteta-mesüa aru.

Aji oda, mapang kobi meli-i ano bar apuani nema Tsüngremer temeim taoji ajanga jabaso ka aser jala ka ta moatsü. Oda, yamaji liyonga ligo aodang la-i Jala-Jabaso bar asemji oda chiyungtsü nunge tenzüker aben-Suoshi amala mesüra ano oda kibong kanung chirnurtem nüngdakba kechi sarina ajak nung oda kecha tebandang meli-i parnokji anepalua-mesüa aru. Aji-oda, bar kibongji tenati Tsüngrem dang sara sadema dang tena kibong mesütsü asoshi sentongtem yangluba aser acha-ayangba ajak nung oda asen teyanglur Tsungremsa tajungba asünungji tena kibongji kangadang temoatsü nung lia aru. Aji oda, liyonga arudang ano bar amala tu alimar tashitak kar agi menep. Oda, amitsür ang ka asünungji kangadang timtem aser mokokmein tia ka nung liasü, Koda masünunji ano merenba-o-ba kinungtsü tenati-ang anepalutsüsa kümadok. Aji oda, tena kibong khuret den ano bar tamo shirangba anepalutsüji kangadang khuretsa ajangshia liasü. oda, Tsüngremer sentongji aseni memetetnungji amala shirangji taneptsü müngui ano tamajungba-ang küma teimla makai kümadok. Künü anogo anüpong mapang kanung amolai la shirang yipden nungi merenba jar ba dang yamai shia liasü. tebo-tanubo meren nü lanuwa ni nüdang kangadang maketmeseni na kangadang jashidakja temulung shirangadang lidaktsüogo. Anungji, nai Tsüngremer tenüng nung yimlibilema Kü-nem tai tokangma ta shia liasü. Aji oda, yamaji lir anogo ishika sülen la arishi tembang.

Anungji asenok ajaki iba lima nung tatsüka alidang asenoki pei sünütsüsüa pei mulungba nungdang libaliroa meli-i kati-ka den temeimtep, tesendaktep aser amalitep ka-a alitsübaji kangadang nüngdaker. Aji oda, iba nungjidang asen teyanglur Tsüngremjia atener aser bai asenok kija takum shianem pei yari moatsür. Anungji iba otsü tilaka ajanga asenok ajak taküm nung temelenshi aser tajangzük kar danga ngudisü ta teimla nung Kü otsü tembanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lebanon nung Yisu keraklong raksatsüsang sepai tepuokdaki yok

Tel Aviv, Rongchii/April 22 (Agencies): Lebanon south tsütsü Yisu Khrista indang keraklong raksatsüba mechi sepai ana anogo 30 'military detention' alitsü aser combat duty nungi agientsü, ta Israel mitkari April 21, 2026 nü ashi.

Israel sepai kati sledgehammer ka amshia kangki nungi tsüka aliba Yisu keraklong tekolak nung akoba noksa ka online nung prokshia tesem balala nungi aitsüba sülen iba telemtetba ya agi.

Iba keraklong ya Israel den arütsü anasa Lebanon south tsütsü Debl ta sür Khristan yimtsüng ka nung liasü.

Iba tatalokba bushisüngdang tembanga mitkari sangdong ka agütsüba nung, Khristanpur temaitsü raksatsüsang sepai aser iba mapa inyakba tangoksang sepai ya combat duty nungi agientsü aser military detention nung anogo 30 alitsü, ta ashi.

Iba keraklong akosadang ano yangji sepai trok liasü aser parnoki mesoit mesüra osang magütsü, anungji parnok jangjatepa jembishinü akatsü atema taok ta ashi.

Iran bhukuma Hezbollah telok Middle East rara nung March 2 nü nungi shilem agi tenzükba sülen Israel-i Lebanon tesem balala nung tayimtsü amshia amak aser iba linük south tsütsü maddoka lir.

Iba rara nung nisung 2,400 dak tema tepsetogo aser million ka dak tema pei ki yutsür tesem balala nung jenshia lir, aser taoba hopta nungi ceasefire liaka asürtem maneni timba akumer, kechiaser ki o jen teraksa nungi nisung tasü mang tali nguteter.

Iba rara nung Israel nung sepai 15 takum samaogo.

"Sepai temi inyakba ya IDF totuyuba aser yimya khenyongi senzüka yutsüba lir

ta bushisüngdangba mapang jangjatet," ta mitkar sangdong nung ashi.

Onoki Lebanon nung operations ya Hezbollah kiralongrar telok aser danga kiralongrar teloktem anema kisüng lir, aser Lebanon civilian tem anema masü, ta ashi.

Israel mitkar temi X post ka nung, Debl nung raksatsür aliba keraklong ya sepaitemi yangji aliba nüburtem den angatettepa melentsüogo, ta ashi aser Yisu kangki nung metaba keraklong tasen ka indang noksa ka lemsatepa liasü.

Hombarnü Israel Ato Kilonser Benjamin Netanyahu-ia IDF sepai kati Lebanon south tsütsü Catholic religious icon ka raksatsüba angazüka pa kanga süngmanger aser jashir ta ashi aser aibelener nem tapet temerenshi agütsütsü nangzüka liasü.

ANOGO ABEN TSÜNGREM DEN

Kodang ni na angu?

Kibuba Na ayadang, mesüra tzüra dang, mesüra anir lula alidang, mesüra mangsa alidang, mesüra shiranga alidang, mesüra tsüngden chiokdak alidang, kodang na ngua meyari? Mathi 25: 44.

Parnoki Pa mangsa alidang, yaa alidang, tzüra alidang, mesura timtem nung alidang Pa manguba indang Yisui idaki mejembir. Saka Yisu mulungjang nung parnoki agutsüba kulitemji mali asu. Pai langzü, "Nenoki nungdakbapur nungdak mapang meyarira, ibaji nenoki ni meyari!" Pai teyari nungdakbapur den ka akum.

Asenok asoshi teinyaktsüji tongmelang nungdak mapang shibai ayimten aji masu saka tayimtenba nung shibai lemsatep ibaji lir. Ajak nungdak peridaktsutsu asoshi Tsüngremi alima nung toktsü. Nisung nungdak nung langzüa Tsüngremi mulungba tajung inyaktsübaji asen shilem. Idaki Tsüngrem nuburi lokti asoshi bilemstü akhanger. Lokti tetezü, tembar mesura kiyonger. Lokti atema mebilemba tetezü asen tembar, mesura kiyonger asoshi mebilemer. Yaa alir, mangsa alir, tzüraa alir aser timtema alirtem asoshi mebilemer. Parnok meyariba tetezü Khrista dang meyariba.

Laos nung Khristanpur azüokba anentsü ayongzüker

Vientiane, Rongchii/April 22 (Agencies): Alima tesem balala nung aliba Khristan telok aser human rights watchdogs temi ashiba agi Communist Lao sorkari Khristanpur aser talisa indigenous minorities tem reshikangshiba aser azüokba tali akumer, shirnok linük balala agi müketbanger aliba iba linük nung nütsüng yongsük million ti aliba nungi tesadang jungnüa lir.

Tamanga yimsü temeden ya nüburtem nem agüja lir aser sorkari Theravada Buddhism aser Khristan yimsü - talisa Protestant Lao Evangelical Church (LEC), Seventh Day Adventists aser Catholicism melar.

Laos nung Khristanpur 220,000 aliba ya timba LEC nungi lir. Yangi Catholic nung 40,000 shi lir. Parnok ya Khmu mesüra Hmong ama ethnic aser indigenous minorities ajunga nungi lir.

Ajisüaka aiben asangsang nung khenyongi balaka alir, talisa meta talang, tenem tekong aliba tesemtem nung Khristan kibongtem tashiyim amshia ali rakzükdang pei kidang nungi meindoker.

2026 World Watch List nung Laos tera tajungba kuma lir, koba Open Doors International ajanga bendenba religious freedom indang ranking lir.

Alima nung Communist linük pongu anünga aliba nungi Laos ya ka lir, aser iba linük ya 2025 World Watch List jenjang 26 buba nung aliba tang jenjang 28 buba nung lir.

Southeast Asian linük asem list nung aliba nungi Laos ya ka lir, kong Myanmar ya jenjang 14 buba aser Brunei ya Khristanpur asoshi tamajungtiba linük 50 nung tatembangba alitsü.

"Local authorities aser yimtsüng nung lenirtemi Khristanpur kanga reshikangshia amshir, kechiaser item lenir yagi ethnic traditions wazüka ayur, sorkar indang policies amshir, nüburtem tashi ita lidaktsütsü meranger aser Communist ideology amshir," ta Open Doors ajanga 2026 report nung Laos indang ashi.

"Communist yimsüsüba kübok ketdangsür temi Khristan yimsü ya timtem ka lir aser azüoktsü nungdaker ta züngshir," ta ashi.

Rural areas kar nung Khristan yimsü züina aoba ama yimtsüng sasep nung parnok anemba tali kumogo aser iba kuliji tamanga yimsü mechi Khristanpur pei kidang nungi meindokba shilem 38 agi tali akumba ajanga sayur.

Communist ketdangsür temi tamanga yimsü tsütsü inyaksangshi ajunga kanga sashia meiter, yimsü agizükertem pei kinunger aser pei aliba tesem nung lenirtemi merenshia amshir, ta report nung ashi.

Laos nung nütsüng yongsük shilem 40 jungnüa ethnic aser indigenous minorities nungi lir. Item rongnung temaba Khmu aser Hmong ya nütsüng yongsük shilem pongu dak tema lir.

Sorkari linük indang sobaliba balala magizüktetba ajanga kin tilatem indang takum lenla aika nung kanga mejungi kongshir, ta UN Special Rapporteur on Cultural Rights Alexandra Xanthaki-i ashi.

Nüburtem takum jenjang tajungba kumdaktsütsü aser terenlok asoshi sorkari sentong yanglua amshiba nung mabensar aser ibaji ajanga jenjang tekübokba nung alirtem

dak kongshir, ta lai tesüsa UN Human Rights Council dangi February ita osang yokba nung ashi.

"Telemtetba agiba inyakyim nung shilem tajung agitsüba nübur indang temeden samaogo aser timba osang prokshiba nung dang amshir."

"Ethnic minorities aser Indigenous nisungtem ta agizüktsü memulungba ajanga international law kübok agitetba temeden mangur, talisa pei sobaliba, pei mulungba yimsü amanga prokshiba, pei oshi amshiba aser pei sasa yimsü asütsü temeden magüsür."

Item temeden ya meta tezülen densema Lao People's Democratic Republic nung amshitsüla, kong ethnic minorities mesüra Indigenous nisungtem timba alir aser ali rongsen peria lir, ta Xanthaki-i ashi.

Unrepresented Nations and Peoples Organization (UNPO) aser Congress of World Hmong People (CWHP) nungia lai bushitetba ya shidak lir ta osang sangdongogo.

"Lai bushitetba ya UNPO, Hmong representatives, treaty bodies aser UN experts temi küm aika nungi ola adoka aruba den puteper," ta UNPO Global Advocacy Officer Nieves Cancela-i ashi.

"Rongsenketzüing terenlok aser linük telungjem tenüng nung Lao PDR-i sobaliba balala aser sobaliba temeden bendanga magütsütsüla, ta special rapporteur-i 2024 küm tekumdangtsü shia lir, aser lai 2026 report agütsüba nunga lisopur aser kin tilatem dak kingshia aibelen mapa inyakba jangjashir."

Samaba, tayang kepzükba, oshioben aser tamanga yimsü nung tenokdangba agütsüba, identity documents magütsüba, ali rakzükba, tashiyim amshia arishiba, lokti nungi sendokba aser Hmong tesemtem nung independent monitoring nokdangba, item kuli ya tejangja lir, ta ashi.

Iba report nung Hmong nungertem pei li nungi meindokba ajanga par sobaliba samatsür aser Hmong nung

dang tesayuba maliba ajanga Hmong tanurtem aser kin ajunga Lao loktiliba nung mezüngshi akumer.

US nung aliba CWHP ya Hmong atema international advocacy group tulutiba lir aser parnoki UNPO ajanga inyaker. Parnoki Hmong nung ya Vietnam War mapang US yarir tongtipang liasü ta bushitet, koba tang tashi Communist Party-i mepelar.

Laos nung sorkar nungi temelaba agir nisung tepsetba, reshikangshia amshiba, tapi agi apuba, nisung shibelenba aser sorkar anemer dak tenük yokba ajanga linük yutsür bendang lima nung jenoka alir, ta human rights groups aser bendanger sorkar temi aitsür.

2023 küm May ita mejangjaba nisungtemi Thailand nung jenoka aliba Lao political activist Bounsuan Kitiyano khaset.

Yamaji mapa tamajung inyaker jangjateta merenshitsü asoshi sorkari mera tejangja magir.



Impur nung Asangma Baptist Arogo indang Rest House ka April 20, 2026 nü Rev. Temsu Jamir, Executive Secretary, ABAM ajanga meshitetsüba sülen tangokba noksa nung angur.

AO OSHI ANGAZÜKDAK:

TANÜ ANGAZÜKTSÜBA OJANG



Yaksü

(n) wara komo ka, aneper külena ayak toktsür (chicken box)

* Tanü asüngbo yaksü wara nokdangtsü atema jelia mozü agütsür.

Yakta

(adv) jetta, kara (quickly, soon, fast)

* Yisu yakta arutsü ta ashir.

OLONG PAITEP # 7482

1		2		3		4	5			
			6							7
	8									
9			10		11					
			12					13		
					14					
16						17				

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S___i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 7481 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsünpang,
- 11. Tesangwa, 13. Aoksa, 15. Putir,
- 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.

NAI-A YA METETTER



China nunger Huang Zhenglong-i December 6, 2025 aser March 15, 2026 tsüngda anogo 100 atongtepa anogoshi kilometer 100 asemba atema otsü tasen ka yangluogo.

Huang Zhenglong dang Long Shao ta ajar aser pai Foshan, Guangdong nung iba alima otsü tasen yangluteta liasü ta Guinness World Records ajanga metetdaksüogo.

Nisung kati anogo 100 atongtepa anogoshia kilometers 100 asembaji mamanger kechiyong iba ya anogo nung marathons 2 ser tesadang asemba ama lir. Ajisüaka Huang-i anepdang shia 7:00 ako nungi Desheng River ayongküm anasa asem.

ISRO YUVIKA 2026 atema Arunachal kaketshir 3 shim



Itanagar, April 22, 2026

(Agencies): Indian Space Research Organisation (ISRO) indang akhümket YUVIKA 2026 atema Arunachal Pradesh nungi kaketshir asem shimogo.

Par asem ya JNV Geku, Upper Siang nungi Miss Geyon Talom, Vivekananda Kendra Vidyalaya, Kuporijo, Upper Subansiri nungi Miss Lukshmi Sikom aser JNV Seppa, East Kameng nungi Miss Jennifer Neri nunger lir.

Kaketshir asem tashi YUVIKA 2026 atema shimtetba ajanga Arunachal Pradesh nung lanur kaketshirtem rongnung parnoki bendanga agütsüba, merangba aser science kanga jangraba sayur.

Women and Child Development Minister Dasanglu Pul-i kaketshir asem nem tenünsang agütsüogo.

Parnoki pei pei school, kibongtem aser state ajunga atema konang tulu bentsür aruogo ta Minister Pul-i ashi.

Parnoki takok angubua ajanga lanurtem maneni ajungmesotsü aser science o innovation nung tajungtiba akümtsü merangtsü imlar ta laisa metetdaksü.

School tanurtem dak scientific curiosity adokdaksütsü atema YUVIKA sentong agir. Iba ajanga kaketshirtem space science aser technology nung ajemokdaksür aser parnoki research p innovation wadang jangratsü ajungmesor.

Meghalaya sorkari CM-INSPIRE scheme tenzüker

UPSC prelims ajanger nem Rs 50,000; mains qualifiers nem Rs 1 lakh

Shillong, April 22, 2026

(Agencies): Meghalaya sorkari April 21, 2026 nü UPSC Civil Services Examination atema candidates yaritsüba osang metetdaksüogo.

Iba ya Meghalaya nungi UPSC tatidang agütsürtem indang financial assistance scheme ka lir.

'CM-INSPIRE' scheme

kübok UPSC preliminary stage nung takok anguba candidate nem Rs 50,000 angutsü aser mains examination asoshi qualify asür nem Rs 1 lakh agütsütsü.

"Meghalaya lanurtemi civil services nung shilem agiba ajema akümba ajungkettsü aser iba tatidang asoshi renemba mapang senotsü teyari agütsütsü mechi nung iba scheme tenzüker" ta

Chief Minister Conrad K Sangma-i ashi.

"India administrative framework nung Meghalaya nunger teimba kümdaksütsü atema iba mapa tenzüker. Iba scheme ajanga candidate temi senotsü timtem ajuruba ajema kümdaksütsü aser lanurtem public service jangradaksütsü atema lir" ta CM Conrad-isa metetdaksü.

AAPSU-i model institute ama Pasighat college adopt asür

Itanagar, April 22, 2026

(Agencies): All Arunachal Pradesh Students' Union (AAPSU)-i Jawaharlal Nehru College (JNC), Pasighat adopt asütsü lemtetogo aser iba ya state nung higher learning indang model institute ka kümdaksütsü nükjidong nung lir.

AAPSU Central Executive Council senden nung iba lemtet

agi aser iba sülen parnoki Education Minister dang iba sentong nung sorkari yariteptsü mepishia shidi ka zülüogo.

Arunachal Pradesh nung higher education wadang nung JNC Pasighat ya foundational institution ka ama lir. Iba reju ajanga putu aika kaketshir aser tanishirtem adokdaksür aser iba nung student movement aser AAPSU nunga züngsemtem lir

ta parnoki metetdaksü.

AAPSU-i temulung agütsüba nung academic standards tajungba akümtsü, infrastructure ulushitsü aser long-term development atema lir.

Iba inyakyim ajanga JNC Pasighat ya Arunachal Pradesh nung higher education tongti centre ka kümdaksütsü ta AAPSU-i ashi.



Orchid Society of Assam (OSA)-i Assam nung provincialised colleges pezü den Memorandums of Understandings sign sütepogo. OSA-i Silapathar Science College (Dhemaji), Jiadhah College (Dhemaji), Tengakhat College (Dibrugarh), aser Tinsukia College (Tinsukia) den MoU agiba ya külemi maparen inyaka aotsü atema lir. Parnokisa kasa nükjidong atema Arunachal Pradesh nung Darak Tourism and Social Welfare Foundation (DTSWF) den tesentaktep yangluogo. Item MoU ajanga parnoki wild orchids aser medicinal plants atema külemi studies agitsü aser conservation mapa inyaksü.

Nepal home minister Sudan Gurung-i mapa toktsüogo



Kathmandu, Rongchii/April 22 (Agencies): Nepal Home Minister Sudan Gurung-i Bodhbarnü pa mapa toktsüogo. Office mapa agizüker aliba mapang senotsü ochi meshi-i amshiba atema aitsüba sülen pai mapa toktsü.

Gurung, shiba March 27 nü Home Minister mapa abentsü atema shima liasü, pa mepetmesü nung aliba shishilembar ka den sendaktepa aliba atema taitüsü aika akümba mapang tang mapa nungi anenogo.

Pai ashiba agi, pai mapa toktsüba ajanga tebendang

makai ken o bushisüngdangtsü atema lenmang lapoktsütsü aser office nung aliba mapang mangatettep nungi jenbotsü.

Ato Kilonser Balendra Shah indang secretariat sangdong ka ajanga ashiba agi, Gurung-i pa indang resignation shiti Ato Kilonser nem agütsü, shiba home ministry portfolio ya agizükogo.

Gurung ya taoba küm September ita Gen Z puri anir longkak aitba nung shilem agir ka liasü. Longkak aitba mapang Maitighar Mandala aser Naya Baneshwor tesem nung pai longkak aiteritem nem

tzü lemtsüba nguogo.

Paisa, Shah (iba mapang Kathmandu mayor) aser Rastriya Swatantra Party (RSP) tir Ravi Lamichhane na tsüingda tenangzüktepba yangluba nung tongtibang shilem agia liasü.

Kasa mapang nung linük yimsüsüa aliba RSP party-i benokba sülen Ato Kilonser Shah-i April 9 nü Labour, Employment and Social Security Minister Dip Kumar Sah mapa nungi anentsüogo.

RSP tir Lamichhane-i Sah anema jenjang agitsü mepeshia metetdaksü. Pai pa tashi mashiyimi amshia pa kinungtsü Health Insurance Board nung tenure tembangba sülen maneni shimshiba atema pa aija liasü.

Sah mapa nungi anentsüba sülen Ato Kilonseri Labour Ministry mapa yaa agizüka liasü.

2025 küm September ita Gen Z puri anir longkak aita K P Sharma Oli-i aniba sorkar atsüingtokba sülen Shah-i aniba RSP party yagi Nepal nung sorkar kümteta liasü.

Myanmar military sorkari yimjung atema sensaksemtsü jaok

Yangon, Rongchii/April 22 (Agencies): Myanmar nung military-i teyari agütsüba sorkari telungpurtem dang yimjung atema sensaksemtsü jaokogo, saka telok anatibo kara kara magizüki liasü.

General alisang tir Min Aung Hlaing shibai anir küm pongu tejakdang sorkar atsüingtokba sülen linük nung civil wara adoker lir, pai Hombarnü sorkar senden ka nung pai ceasefire atema memulungi aliba telungpur teloktem anogo 100 tsüingda yimjung atema sensaksem nung dendaktsüner, ta ashiba state media sangdong ka ajanga metetdaksü.

"Sensaksem nung medeni aliba teloktem July 31 nü atakzükja aliba anogo metembang tsüingda sensaksem nung shilem agitsü jaoker," ta pai ash. Paisa, 2021küm coup masü tsüingda Nationwide Ceasefire Agreement (NCA) nung sign sür aliba teloktem metetdakja liasü.

Tir-i iba olen lemsatepba sülen mapang tatsüka dang lir Karen National Union-i iba maangka magizük. Iba telok nungi otongdar kati ashiba agi, 2021 küm Aung San Suu Kyi-i aniba

civilian sorkar atsüingtokba sülen parnok NCA nungi atsüing aser sensaksemtsü atema meyipa arutsü asoshi kecha tebilemba mali.

Chin National Front otongdar Salai Htet Ni-i ashiba agi, par teloki military-i kecha shilem magiba federal democratic system ka aginer.

"Onok iba atema military-political rara ka rara asünung, military dang ser nung terprangtsü melener parnok sasa dang administration' ta ajaritem den onok sensaksemtsü kecha mali," ta pai ash.

Min Aung Hlaing ya parliament-i iba ita tetenzüklen tir asütsü shim. Iba sorkar tasenba ya linük ishikati dang agizüka lir.

"Military-i onok jaokba ya military yimsüsüba kübok nüburttem timtem tekangshi atsülangdaksütsü atema lir," ta National Unity Government otongdar Nay Phone Latt-i ash. Iba telok yagi military yimsüsüba anema arudar.

Military-i sorkar atsüingba sülen nüburttemi iba anema longkak aitba mapang army aser telungpurtem raratep taliba kümogo aser iba ajanga linük nung civil war adoker lir.

Iran-i Strait of Hormuz nung rong ana apu

Tehran, Rongchii/April 22 (Agencies): Iran-i Strait of Hormuz nung bendanger shishilempaba rong ana puer par tzükum lenir anir ao, koba United States Tir Donald Trump-i Tehran den ceasefire atsülangtsü ta shir ghonda ishika lir ataloker.

Iran indang Islamic Revolutionary Guard Corps (IRGC)-i ashiba agi, rong ana yagi maritime regulations nung aibelen aser osang magitepi iba tzü lenmangi ait, ta Iranian state media ajanga ashir.

Bodhbarnü Iranian gunboat kati Oman anasa container rong ka dak injang khaloktsüba sülen iba ya ataloker, ta United Kingdom Maritime Trade Operations (UKMTO) centre ajanga ash.

Rong tanishisangi IRGC rong ka parnok indang rong tonga aru aser injang khaloktsü ta ash, ta British maritime monitoring agency-i ash.

"Iba yagi apu nung teraksa tulu adokdaksü. Mi adokba mesüra libajen menentsüba

osang mali," ta UKMTO-i ash. Asü-amaba osang mali aser rong nung aliritem ajak kumzükja lir.

Strait of Hormuz ya alima nung tongtipangtiba tzü lenmang ka lir, koba ajanga alima nung totzü shilem pongu shi abener.

British maritime security firm Vanguard Tech-i ashiba agi container rong ya Liberian flag songer tzüyim nung jaja lia akha aser parnok Strait of Hormuz ajanga aotsü temelaba lir ta metetdakja liasü.

Ajisüaka Iranian news agency Tasnim-i ashiba agi, Iran sepaitemi tekumdangtsü agütsüba rong yagi senzükja yutsü.

Sea of Oman nung US-i Iranian commercial ship ka apuba sülen IRGC indang Khatam al-Anbiya Central Headquarters nungi tekumdangtsü ya agüja liasü, ta IRNA news agency ajanga ash.

Iran nung rong nung injang khalokja par navigation system raksatsüba sülen parnokibo Washington-i ceasefire nung

aibelen "armed piracy" mapa inyaker ta aitsü.

Iba ya matalokdang, Pakistan army tekolakba Asim Munir aser Ato Kilonser Shehbaz Sharif nati mepishiba sülen Iran amaktsü sentong aliba mapang atsülangtsü, ta Trump-i sangdonger liasü.

Truth Social nung, Iran sorkar ya kanga mejungi ajar aser telungjem nung nokdaksü mapang nüngdakba ajanga iba telemtetba ya agi, ta Trump-i zülu.

"Par lenir aser teshimtet nisungtem lungjemer proposal ka bener maru tashi Iran linük amaktsü aliba soita atatsü onok dang asüingdang," ta pai zülu.

Ajisüaka Iran nung ronnendak US tzüyim sepaitemi mokdanga aliba melapoktsü aser mitkar dang renema atatsü totuyuba agütsüogo, ta paisa ash.

Iba sangdong ya pai anogo ka tejakdang jembiba den balala lir, kong Trump-i Mongulbarnü alema ceasefire atsülangtsü amai lir ta shia liasü.

DEEDS FOR GOVERNMENT EMPLOYEE FOR CHANGE OF NAME/SURNAME AND TRIBE IN THE SERVICE BOOK

BY THIS DEED I the undersigned **NAHZEI KONYAK** lately called **H NAHZEI KONYAK AND NAHZEI K** (former name) employed as **LDA, UNDER DEPARTMENT OF ADC ABOI, GOVT. OF NAGALAND.**

Do hereby:-

- Wholly renounce, relinquish and abandon on the use of my former name of **H NAHZEI KONYAK AND NAHZEI K** in place thereof do assume from the date thereof the name of **NAHZEI KONYAK** and so that I may hereafter be called, known and distinguished not by my former name of **H NAHZEI KONYAK AND NAHZEI K** but by my assigned name of **NAHZEI KONYAK.**
- For the purpose of evidencing such my determination, declare that I shall at all times hereafter in all records, deeds and writings and in all proceedings, dealings and transactions private as well as public and upon all occasions whatsoever use and sign the name of **NAHZEI KONYAK** as my name in place of and in substitution for my former name of **H NAHZEI KONYAK AND NAHZEI K**
- Expressly authorities and request all persons at all times hereafter to designate and address me by such assumed name of **NAHZEI KONYAK.**
- In witness whereof I here unto subscribed my former and adopted name of **H NAHZEI KONYAK AND NAHZEI K AND NAHZEI KONYAK** affixed my seal this 12th day of December 2025.

Old Signature.....

New Signature.....

Signed and delivered by the above Name **NAHZEI KONYAK** and formerly known as **H NAHZEI KONYAK AND NAHZEI K.**

LOST NOTICE

It is notified for the information that an arms license has been lost somewhere at Dhoibinala area, Dimapur. If anyone finds it may kindly contact at the mention Mob. No. : 85750 15163

Details of the license :-

NAME	: ANYIE WALLIEMP
License No.	: 386 NH/K
UIN	: 254560030437362016
Date of Issue	: 29-05-1970



Indian Army Chief of Defence Staff General Anil Chauhan-i United Kingdom nung UK Chief of the Defence Staff Air Chief Marshal Sir Richard Knighton den ajurutepdang tangokba noksa ka yangi angur.

OFFICE OF THE PRINCIPAL
CLARK MEMORIAL HR.SEC SCHOOL, IMPUR (Estd: 1895)
 (Affiliated to NBSE)

ADMISSION NOTICE

It is hereby notified for the information of all that, issue of admission form for Class 11 (Arts) is going on. Interested candidates may avail the forms from office during office hour (9:00 AM to 3:00 PM). Admission will start immediately after declaration of HSLC results.

Subject Offered

- English
- Ao
- a. Pol.sc
b. History
c. Education
d. Economics
- Environmental Education

Special Features

- Qualified, trained & dedicated teachers
- Hostel facilities available for both Boys & Girls
- Focus on spiritual and moral education
- Provides skill based education
- Special package for Full Time Church worker children. 50% fee concession during admission and also in all monthly hostel and school fees.
- We strive towards Excellence in all round development of a child

Sd/-
Principal
CMHSS, Impur

Inter District Tournament: Dimapur & Chumoukedima na final asayatsü



Player of the match Joshua Ben Ozukum (Dimapur)

Dimapur, Rongchii/April 22 (TYO): Tang asaya aliba Senior Men's Inter District Tournament 2026 nung semifinal asaya nung Dimapur aser Chumoukedima nati takok tajung ngua final tongtetogo.

Mezüngbuba semifinal ya Sovima Cricket Ground, Chumoukedima nung Niuland aser Dimapur na asaya liasü.

Mezüng bat asütsü shimba sülen Dimapur team-i over 41.3 nung asayar ajak out ser run 175 yanglu. Parnok rongnungi Samir Ali (run 36) aser Anirudh Yadav (run 30) nati kanga junga asaya liasü.

Niuland bowler temi run magütsüi ball kanga junga ano. Parnok rongnungi Vino G Zhimomi-i over 10 nung run 19 agütsür wicket 4 agi aser Sujal Prasad Thakur-ia over 3 nung run 3 agütsür wicket 2 agi.

Asaya tanabuba shilem nung Niuland pur batting amenba mapang parnoki over 39.4 nung

asayar ajak out ser run 128 dang yanglua asaya makok.

Parnok rongnungi Hokaito Zhimomi-i (run 27, ball 53) run timtiba yanglu, saka tanungba asayartemi teyari magütsütet.

Dimapur team bowler tem rongnungi Joshua Ben Ozukum-i over 6 nung run 19 agütsür wicket 4 agi aser Yashimeren Jamir o Tahmeed nati wicket anana agia liasü.

Iba asaya ya Dimapur team-i run 47 agi akok aser Joshua Ben Ozukum (Dimapur) nem Player of the Match naroküm agüja liasü.

Tanabuba semifinal asaya ya Chumoukedima aser Kohima na Nagaland Cricket Stadium, Chumoukedima nung asaya liasü.

Mezüng batting amenba sülen Chumoukedima team-i over 50 nung asayar ajak out ser run 315 yanglu. Parnok rongnungi Aloto Sumi-i ball 133 nung run 127 yanglua liasü. Pa

nem Yugi-ia (run 64) teyari agüja liasü.

Kohima team bowler tem rongnungi Peter aser Imomenba nati wicket asemsem agi aser Lanasunep jamir-ia wicket 2 agia liasü.

Kohima pur batting amenba mapang parnoki over 45.3 nung asayar ajak out ser run 189 dang yanglutet. Parnok rongnungi Seyievizo Zaputou (run 39) aser Zidu (run 27) nati tajungba asaya liasü.

Chumoukedima bowler temi asaya amokbanger asaya aser parnok rongnungi Imliwati-i wicket 4 aser Jonathan Rongsen-i wicket 3 agia liasü.

Iba asaya ya Chumoukedima-i run 126 agi akok aser Aloto Sumi (Chumoukedima) nem Player of the Match naroküm agütsü.

Team ana ya April 24 nü Nagaland Cricket Stadium: Chumoukedima nung final asayatsü.

India nung volleyball asaya mepetmesü nung lir

Rongchii/April 22, 2026 (Agencies): Football asaya aser athletics sülen Indian volleyball tang mepetmesü nung lir.

Federation Internationale de Volleyball (FIVB)-i Volleyball Federation of India's (VFI) agizüker aliba aginogo. Temzüng ozüing aser ketdangsuba dak sendakba nung tinyaktsü tim minyakba atema iba jenjang agi.

National camp nungi asayar tejen ana tuguba sülen anogo ishika lir iba ya atalokogo. Facility majungba aser asayar shimba nung tashishitsü keta aliba ashishiba sülen tena yagi camp tokja liasü.

FIVB-i sangdong ka ajanga, Volleyball Federation of India interim lenirtemi governance standards metongtet ta ashi.

"FIVB-i amenokja aliba legal aser administrative tenüngdakattem akümtsübu masü. Anungji VFI indang provisional recognition meyipa agiogo," ta kasa sangdong ajanga metetdaksü.

Federation nem ita ti atema provisional recognition agütsü, ajia inyakyim sülen anidak nung dang agütsütsü liasü.

VFI aginba sülen Steering Committee kati iba asaya azioka lir, kong Indian Olympic Association aser FIVB nungi züingsemtem densema lir.

Iba committee yagi Athletes' Commission ka tentetsü, state association election achaayangtsü, temzüng ozüing yanglushitsü aser ochishia merit dak ajemdaker asayartem shimtsü asoshi inyaktsü.

Parnokisa asayamungtem ayongzüktsü aser FIVB development programme kübok international coaching support anir arutsü.

Asayar tejen Anand K aser John Joseph nati Ahmedabad nung national camp toktsür aoba sülen iba mepetmesü ya tuluba aküm. Tena yagi facility majungba, coach tem tetemsü masüba, Serbia nung coach Dragan Mihailovic aginba aser

asayar shimba nung politics asayaba ashishia liasü.

"Ken o asadanga kecha mali, recovery mali.. coach temi kecha memetet, parnok 1950s nung alir," ta Anand-i ashi.

Paisa, tebilemteü lemsatepba atema asayartem dang tatok meshitsü ashi, koba pa aser par teammate temi magizük, ta ashi.

VFI-i item taitsübatem ya magizük aser iba ya politics asayaba ka lir ta ashi.

Mepetmesü adoker liaka Indian volleyball ajungkettsü atema FIVB bendanga agütsür lir aser parnok indang Volleyball Empowerment Programme ajanga 2026 atema sen crore 2.1 agütsütsü nangzükogo.

Asayartem ajangzükdaksütsü aser tetsür aser tebur team tem high-performance development dak rangloker lir.

India nung AVC Men's Cup June 20 nungi 28 tashi Ahmedabad nung asayatsü lir, saka iba asayamung atema mejangjai kümogo.

DYRS Mkg-i pre Subroto asayamung indang metetdaksü

Dimapur, Rongchii/April 22 (TYO): District Youth Resources & Sports Officer, Mokokchung-i sangdong ka ajanga, 65buba Pre Subroto Tournament (Football) 2026 nung shilem agütsü jangraba Mokokchung District kübok

school tem dang online portal ka nung parnok züingoksemtsü metetdaksüogo.

Iba asayamung ya tetsür aser tebur naprongla atema asütsü aser under-17 asayamung ka asütsü, ta kasa sangdong ajanga metetdaksü.

SAFF C'ship nung India Bangladesh & Maldives den ata lir

Rongchii/April 22, 2026 (Agencies): SAFF Women's Championship nung India tetsür team Group B nung Bangladesh aser Maldives na den ata lir. Iba asayamung ya Margao, Goa nung May 25 nungi June 6 tashi asayatsü.

SAFF asayamung ka ayongzüka asayatsü. Tebur asayamung ya 1999 küm Jawaharlal Nehru Stadium nung ayongzüka asaya. Iba küm India team-i final nung Bangladesh koka liasü.

SAFF Women's Championship ya India-i otsü tasen yanglua ponguben koka lir. Parnoki 2010, 2012, 2014, 2016 aser 2019 küm iba asayamung kokogo. Bangladesh-i 2022 aser 2024 küm iba asayamung koker lir. "SAFF Women's Championship 2026 draw atema seeding ya April 21 nü sangdongba FIFA Women's World Rankings dak ajemdaker sütsüogo. India (69th) aser Nepal (87th) na Pot 1. Bangladesh (112th) aser Sri Lanka (162nd) na pot 2. Bhutan (164th) aser Maldives (167th) na Pot 3," ta AIFF-i ashi.

Tang agi tanabenbuba India nung SAFF Women's Championship ayongzüka asayatsü lir. 2016 küm Siliguri, West Bengal nung iba asayamung ayongzüka asayaogo, kong India-i title pezübuba bena liasü.

Kasa mapang nung Goa nung tang agi tanabenbuba

Women's Championship ya India-i otsü tasen yanglua ponguben koka lir. Parnoki 2010, 2012, 2014, 2016 aser 2019 küm iba asayamung kokogo. Bangladesh-i 2022 aser 2024 küm iba asayamung koker lir.

SAFF Women's Championship 2026 draw atema seeding ya April 21 nü sangdongba FIFA Women's World Rankings dak ajemdaker sütsüogo. India (69th) aser Nepal (87th) na Pot 1. Bangladesh (112th) aser Sri Lanka (162nd) na pot 2. Bhutan (164th) aser Maldives (167th) na Pot 3," ta AIFF-i ashi.

Draw: Group A: Nepal, Sri Lanka, Bhutan Group B: India, Bangladesh, Maldives.

Ali Raza-i otsü tasen ya yangluogo



Rongchii/April 22, 2026 (Agencies): Arishi küm 18 tain pacer Ali Raza-i Pakistan Super League (PSL) nung otsü tasen ka yanglua pa ya Pakistan nung asayartem rongnungi hat-trick agiba asayar tanobusang kümogo.

Bodhbarnü Peshawar Zalmi aser Karachi Kings na Gaddafi Stadium nung asaya 32buba asayaba mapang pai iba otsü tasen yanglua liasü.

Raza-i hat-trick agiba ya tang asaya aliba season nung mezüingbuba hat-trick aser PSL puti otsü nung Peshawar Zalmi bowler kati hat-trick agiba mezüingbuba lir.

Lanur asayar yagi pressure nung kanga süngjema asaya-a

Karachi team nungi lower order tem out süja liasü. Pai run 41 agütsür wicket 4 agi.

Asaya nung Karachi puri asayar 9 out ser run 182 dang yangludaktsüba nung pai tongtibang shilem agia liasü. Karachi atema Jason Roy-i run 85 yanglua liasü.

Iba alizüing tongtetba sülen Raza ya PSL nung hat-trick agiba asayartem indang list nung züingoksemogo.

Iba list ya Mohammad Amir nungi tenzüker, shibai Karachi Kings nungi asayaba mapang mezüingbuba hat-trick agia liasü. Iba sülen Junaid Khan, Imran Tahir aser Mohammad Sami nungeria hat-trick agiogo.

BILEMDANGANG

"Tetenzük lira tatembanga liküm."